

LE T T R E

DE

MONSIEVR LE DVC

DE MAYENNE,

AV ROY,

Avec la response a icelle par sa Maieſté.



Suivant la coppie imprimee a Paris,
Chez Fed. Morel, & P. Mettayer Imprimeurs
ordinaires du Roy. 1617.

Avec privilege de sa Maieſté.

Lettre de Monsieur le Duc de Mayenne au Roy,

SIRE,

Je puenoye Monsieur le Baron de Linieres à vostre Maieité, pour la supplier tres-humblemēt de vouloir ouyr mes iustes calamitez, elperāt qu'elle me fera l'hōneur de les receuoir fauorablemēt & que la bonté sera touchée du iuste ressentimēt que j'ay des violētes entreprises faites sur ma vie, & les places de mon Gouvernement, donnees à feu mon pere, non pour satisfaction ny recompence, mais pour marque & gage honorable de la fidelité & conduite, estimee par tous les bons François dans les guerres civiles, ayant cōserué vostre Estat en son entier cōtre les desseins estrangers, sans en souffrir aucun desmembrément.

J'espere dayantage, Sire, que vostre Maieité par la bonté & prudence, necessaire en telle occasiō fera faire chascunmēt exemplaire de celuy ou ceux qui ont melchamment, a prix d'argent, tramé & cōduit ce mauuais dessein, mesmes de celuy qui vouloit en estre l'executeur. Ce proceder, Sire, de rair la vie de vos subiets, & de ceux qui ont l'honneur de tenir des premiers rangs & principales charges de vostre Royaume, qui ne telmoignent par leurs paroles, actions & deportemens, que toute obcyssance, qui ne respirēt que vostre serui ce particulier, & le bien de vostre Estat, qui volontairement pour ceder au temps & aux conseils violens, se sont voulus bannir de la France,

acceptans les propositions qui leur ont esté faites des voyages aux pays estrangers, qui pour le respect qu'ils portent à vos commâdemens, ont oublié toutes iniures & calōnies qu'ils ont reçu de vos Ministres; bref, qui ne cherchent que du repos en leur vie dās l'innocence de leurs aētiōs; ne se peut nommer autrement qu'une persécution insuportable & inouÿe dans vostre Royau-me, qui passe plus auant que la vengeance que l'on peut rechercher contre les particuliers. A quoy ie supplie tres-humblement vostre Majesté d'auoir quelque esgard, puis que c'est le de- uoir de ceux qui sont interessez en la conseruatiō de vostre personne, & de vostre Estat, de vous en donner auis; & ma plainte estant appuyee des loix diuines & humaines, m'a faict espérer que vostre Maiesté la receura avecques la mesme bō- té qu'elle à accoustumee de tesmoigner à tous ses subiets en leurs iustes requestes: Et qu'elle me fe- ra l'honneur de croire qu'aucunes sortes de per- secutions ne me pourront iamais faire chāger la resolution que i'ay prise de tesmoigner par toutes mes actions le tres humble seruite que ie dois à vostre Maiesté. A quoy ie n'espargneray mon sang & ma vie, croyant aussi que vostre Maiesté aura plus agreable de la voir finir de ceste sorte, que par de si mauuais moyēs, Estant, Sire, de vo- stre Maiesté, tres-hūble, tres-obeyssāt, & tres fi- dele seruiteur & subiect,

MAYENNE.

De Soissons ce II. Iānier. 1617.

4

LETTRE DV ROY, A MONSIEVR
le Duc de Mayenne.

MOn Cousin, i'ay veu par vostre lettre de l'vnziesme de ce mois, & entendu par le sieur Baron de Linieres la plainte que vous faites de ce qu'on a voulu attêter à vostre vie. Sur quoy ie vous diray que la conseruation de mes subiers m'est si chere, & particulieremēt de ceux qui tiēnent en mon Royaume le rang que vous y auez, que si vous contribuez autant de vostre part, cōme ie feray de la mienne, pour vous faire auoir raisō de ce crime, vous en receurez sans doute le contentemēt que vous en pouuez esperer. Vous le croirez aisēment, ie m'assure, quād vous verrez que mon Parlemēt [qui rend la Iustice à tout le mōde, & a l'interest des Pairs en singuliere recommandation] en prend cognoissance : Et ce avec tant de soin, qu'il a desia ordōné que le proces sera fait & parfait à l'accusé, au lieu ou vous estes, & qu'estant iuge, il luy soit amené, afin que s'il est trouué coupable de ce dont il est chargé, il recoiue la peine & le supplice deu a l'enormité d'une si detestable entreprise. Ce qui sera indubitablement si vous le voulez, rien l'en pouuāt garantir que la fuitte, qu'il vous est aisē d'empescher, puis qu'il est en vos mains, & qu'il n'y a chose plus facile que le rendre seurement en ceste ville, ou non seulement ie le feray chastier cōme il merite, mais en outre ceux qui se trouueront l'auoir

luseité a vn si pernicious dessein: la raison voulāt
que les auteurs des crimes portent au moins la
mesme peine que ceux qui les doiuent exēcuter.

Je ne souffrirā y iamais qu'en mon estat on pra-
tique impunēment telles meschancētez. Je per-
mettray aussi peu qu'on entreprenne sur les pla-
ces que me gardent mes subiets & mes seruiteurs,
que sur leurs vies. C'est pourquoy demeurāt dās
les bornes de vostre deuoir, vous pouuez vous
asseurer que rien ne vous conseruera plus seure-
ment les villes qui ont autrefois esté consignees
entre les mains de feu mon Cousin le Duc de
Mayenne vostre Pere / que mon authorité.

Je ne respōds point a la façon par laquelle vous
me tesmoignez qu'il les a eues, l'integrité de ses
dernieres actions m'obligeant de perdre la me-
moire des premieres qu'il a beaucoup de fois cō-
damnees luy mesme, le cours de sa vie ayant esté
tel depuis la fin des troubles de la Ligue, que si
vn Souuerain peut deuoir quelque chose à son
subiet, ie confesse luy estre redeuable, particulie-
rement en consideration de ses dernières parol-
les, par lesquelles il vous recommanda & com-
menda plusieurs fois de viure & mourir en mon
obeyssance.

Vous vous plaignez de la violence de ceux à
qui ie donne part au maniemēt de mes affaires:
ie m'en estonne grandement, puis qu'il n'y a per-
sonne qui ne doieue recognoistre qu'en suiuant
leurs aduis, j'ay iusques icy donné a mes subiects

tant de subiet d'actiōs de graces pour ma clemē-
ce, qu'a peine en trouuerra-on vn seul en mon
Royaume qui avec quelque apparence se puisse
plaindre de marigueur, que ie puis dire n'auoir
iamais exercee que contre moy-mesme, ayant
esté trop indulgent à l'endroit de ceux enuers
qui selon Dieu & selon le monde ie pouuois vser
de seuerité.

Vous me mādéz que pour ceder au temps, vous
auez voulu vous bannir de mon Royaume, ac-
ceptant les propositions qu'on vous auoit faictes
d'en sortir. Sur cela ie n'ay rien à vous dire, sinon
que l'affection que i'ay pour mes subiets, & parti-
culierement pour ceux qui sont de vostre qual-
ité, me les faisāt plus desirer aupres de moy qu'e
aucū autre lieu que ce puisse estre, ie ne vo' eusse
iamais permis le voyage dont vous parlez, s'il ne
m'eust esté proposé, comme vous scauez, a vostre
instante priere & supplication, & si ie n'eusse esti-
mé vous rendre vn tesmoignage signalé de ma
bonne volonté, en vous l'accordant,

Au reste, ie vous prie de croire que les perse-
cutions [pour vser de vos termes] ne serōt iamais
telles en cet Estat qu'elles en puissent chasser per-
sonne; me sentant par la grace de Dieu mainte-
nant assez fort, pour executer la resolution que
i'ay prise de ne souffrir qu'aucun de mes subiets
en persecute d'autres : & faisant estat de viure a-
uec tant de bonté, que ie ne doute point que cha-
cun à mon exemple ne se tienne en son deuoir,

m'exemptât par ce moyen d'auoir recours à ma puissance pour les y contraindre.

Les tesmoignages que vous me rendez par vostre lettre de desirer chercher vostre repos dans l'innocence de vos actions, me resiouyroient grandement, si vos effets ne sembloient contreuenir à vos paroles: ne pouuant conceuoir que l'innocence puisse compatir avec les intelligences & pratiques qui sont tous les iours entre vous & ceux qui veulent troubler le repos de mon Estat: avec les leuees de gens de guerre que vous auez faiçtes depuis peu, pour grossir vos garnisons, non seulement sans ma permission, mais contre ma volonté: avec le refus de receuoir mon Lieutenant general de Soissons en la ville ou sa charge l'oblige de resider, le bânissant de sa demeure au mespris de mon autorité, sans autre subiet que celuy de l'affection qu'il à au bien de mon seruice, & sans auoir esgard aux prieres & commandemens que ie vous ay faits plusieurs fois de le restablir.

Ie ne sçay pas ce que vous tiendrez pour crime si vous appelez telles actions innocentes. Il n'y a personne despouillé d'intereſt & de passion qui ne les iuge du tout contraires aux loix diuines & humaines, que ie seray tousiours aussi soigneux d'observer, cōme de les faire garder aux autres,

C'est ce qui me faiçt souhaitter que vous vous teniez veritablement dans les termes des protestations que vous me faiçtes, afin que ie puisse

sans peine maintenir la paix en cet Estat, pour la continuation de laquelle ie suis resolu d'employer mon propre sang, tenant a mon bon-heur & à gloire de la conseruer à mon peuple, au mesme prix que le feu Roy, mon tres-honoté seigneur & pere, luy à acquise.

Par là vous cognoistrez la sincerité de mes intentions, que ie vous coniure de seconder de si bons effets, que vous puissiez vn iour, non auoir regret de m'auoir troublé aux desseins aduançageux que r'ay pour ce Royaume, mais vous preualoir de n'auoir pas peu contribué pour les faire reussir. Ie prie Dieu, mon Cousin, qu'il vous en face la grace, & vous tienne en sa sainte garde. Escrit à Paris, ce dix-septiesme Ianvier 1617.

LOVYS,

DE RICHELIEV.

Remerciement à M^{re} de Vitry. 1617.

